

四庫全書

史部

欽定四庫全書

史部

金史卷一百二十九至
二十一

詳校官國子監祭酒_臣覺羅喜善

內閣中書_臣李彤覆勘

總校官舉人_臣章維桓

校對官助教_臣李巖

謄錄監生_臣謝雲

欽定四庫全書

金史卷一百十九

元中書右丞相總裁托克托等修

列傳第五十七

鈕祜祿納新

附劉天起

完顏羅索

烏庫哩鎬

本名
噶老

張天綱

完顏仲德

本名
仲德

鈕祜祿納新由任子入官或曰策論進士天興初倅開

封府以嚴翰稱其年五月擢為陳州防禦使時兵戈搶

攘道路不通納新受命毅然策孤騎由間道以往陳自
兵興軍民皆避遷他郡納新為之擇官吏明號令完城
郭立廬舍實倉庫備器械未幾聚流亡數十萬口米一
斛直白金四兩市肆喧闐如汴之闐闐京城危困之民
望而歸者不絕遂指以為東南生路明年哀宗走歸德
改陳州為金興軍馳使褒諭以納新為節度使俄拜參
知政事行尚書省于陳於是納新立五都尉以將其兵
建威來準虎威富察哈達振武李順兒振威王義果毅

完顏某凡招撫司至者皆使隸都尉司是時交戰無虛日州所屯軍十萬有餘納新與官屬謀曰大兵日至而吾州糧有盡奈何乃減軍所給月一斛五斗者作一斛又作八斗又作六斗將領則不給人心稍怨故李順兒崔都尉因而有異志劉提控及完顏博碩庫提控者預焉納新知其謀常以兵自防及聞大元兵往朱仙鎮市易納新遣五都尉軍各二百人以李順兒副都尉崔某將之襲項城寨孫鎮撫者召順兒議兵事孫至于其家

順兒已擐甲孫欲觀其刀順兒拔示之孫色動即出門
奔去順兒追殺之乃上馬引兵二百人入省說軍士曰
行省剋減軍糧汝輩欲飽食則從我不欲則從行省於
是省中軍士皆坐不起納新聞變走後堂追殺之提控
劉某知害解其虎符以與順兒并殺其子姪婿及鄉人
王都尉順兒令五都尉軍皆甲守街曲自稱行省署元
帥都尉以劉提控語不順斬之坐中明日遂遣赫舍哩
正之送款于汴崔立乃遣其弟倚就加順兒淮陽軍節

度使行省如故未幾虎威都尉富察哈達與高元帥者
盡殺順兒之徒舉城走蔡州大兵覺追及孫家林老幼
數十萬少有脫者初納新聞崔立之變遣人探其事情
而順兒崔都尉亦密令人給構崔立適與納新所遣者
同往同還順兒懼其謀泄故發之益速納新亦知其謀
故遣襲項城欲因其行襲殺之然已為所先劉天起者
起於匹夫初甚庸鄙汴京戒嚴嘗上書以干君相願暫
假一職以自効每言戰國兵法平章博索等信之令景

德寺監造革車三千兩天興元年授都招撫使佩金符
召見乞往陳州運糧上從之一時皆竊笑其僥倖及至
陳行軍殊有方略每出戰數有功陳人甚倚重之順兒
之變天起偃蹇不從為所殺同時一唐古招撫者亦不
屈而死

完顏羅索三人皆內族也時以其名同故各以長幼別
之正大八年慶善努棄京兆適鷹揚都尉大羅索運軍
器至白鹿原遇大兵與戰兵刃既盡以條繫掉金牌力

戰而死九年正月大兵至襄城元帥中羅索小羅索以馬軍三千遇之於汝墳時大兵以三四十騎入襄城驅驛馬而出又入東營殺一千夫長金人始覺之兩羅索以正旦飲將校皆醉不能軍遂敗退走許州會中使名入京師天興二年正月河朔軍潰哀宗走歸德中羅索為北面總帥小羅索左翼元帥收潰卒及將軍瓜爾佳九十奔蔡州蔡帥烏庫哩噶老知其跋扈不納遂走息州息帥舒穆魯玖珠納之時白華以上命送虎符於玖

珠為息州行帥府事玖珠出近侍好自標致騶從盈路
三人妬之各以招集勤王軍士為名得五六百人州給
以甲仗久之漸生猜貳玖珠亦招負販牙儈數百人為
虎子軍夜則擐甲為備一日玖珠使一萬戶巡城三帥
執而驅之使大呼云勿學我欲開西門反即斬之乃召
玖珠玖珠欲不往懼州人及禍乃從三百卒以往三帥
令甲士守街曲玖珠從者過處處執之玖珠獨入三帥
問汝何為欲反玖珠曰我何緣反三帥怒欲殺者久之

小羅索意稍解頗為救護得不殺乃鎖之以瓜爾佳九
十為帥兼權息州蔡帥噶老聞玖珠為三帥所誣上奏
辨之三帥亦摺撫玖珠之過上聞朝廷主噶老之辨且
不直三帥六月赦至蔡噶老懼玖珠為三帥所誅遣二
卒馳送詔書於息乃得免及上將幸蔡密召中羅索引
兵來迓羅索遲疑久之乃率所招卒奉迎七月上遣近
侍局使入息州括馬即召玖珠玖珠至與中羅索辨於
上前時中羅索已授同簽樞密院事上不欲使之終訟

乃罷玖珠帥職授戶部郎中以烏庫哩呼魯為息州刺史時有土豪劉禿兒馬安撫者自蔡朝還以軍儲不給叛入宋州之北關為所焚是時城中軍無幾日日有叛去者且覘知宋人有窺息意息帥懼上奏請益兵為備朝廷以參知政事穆延烏登行省事于息州中羅索以同簽樞密院事為總帥小羅索以副點檢為元帥王進為彈壓帥瓜爾佳九十都尉以忠孝馬軍二百步軍五百屬之行省院於息將行上諭之日北兵所以常取

金勝者恃北方之馬力就中國之技巧耳我實難與之
敵至於宋人何足道哉朕得甲士三千縱橫江淮間有
餘力矣卿等勉之八月壬辰行省遣人奏中渡店之捷
初烏登等赴息既至之夜潛遣忠孝軍百餘騎襲宋營
於中渡我軍皆北語又散漫似之宋人望之駭愕奔潰
斬獲甚衆復奏元帥張閏不遵約束死亡軍士乞正典
刑羅索表閏無罪上遣人赦之比至已死獄中蓋閏為
羅索腹心珍珠之獄皆閏發之烏登廉得其事因其失

律而誅之也九月以呼嚕退縮不能撫御民多叛去奪其職以瓜爾佳九十權息州事十一月宋以軍二萬來攻城中食盡乃和糴既而括之每石止留一斗并括金帛衣物城中皆無聊矣前兩月蔡州以軍護老幼萬口來就食北兵覺之追及於二十里之外至息者才十餘人至是蔡問不通行省及諸帥日以歌酒為事聲樂不絕下及軍士強娶寡婦幼女絕滅人理無所不至三年甲午正月蔡凶問至諸帥殺之以減口然民間亦頗有

知者初諸帥欲北降而遞相猜忌無敢先發者蔡信
聞然諸帥屏人聚議皆言送款南中之為便時李裕為
睦親府同僉和勒端國信使下經歷官乃使送款于宋
發喪設祭謚哀宗曰昭宗州民奉行省為領省丞相總
帥左平章皆娶婦十三日舉城南遷宋人焚州樓櫓州
人老幼渡淮南行入羅山委曲之信陽北兵見火起追
及之無有免者且誅索行省已下官屬于宋宋人令官
屬入城託犒賞從萬戶以上六七百人皆殺之軍中

亦有奮命死敵者宋人論諸軍行省已下有罪已處置
汝等就速魂寨安屯遂以軍防之既而與北軍接南軍
斂避一軍悉為所殺

烏庫哩鐫本名噶老東北路招討司人由護衛起身累
官慶陽總管天興初遷蔡息陳潁等州便宜總帥二年
哀宗在歸德富察官努國用安欲上幸海州未決會鐫
餽米四百餘斛至歸德且請幸蔡上意遂決先遣直學
士烏庫哩布希如蔡告蔡人以臨幸之意六月徵蔡息

軍馬來迓以蔡重鎮且慮有不測詔鎬勿遠迎辛卯車
駕發歸德時久雨朝士扈從者徒行泥水中扱青囊為
糧數日足脛盡癰參政天綱亦然壬辰至毫上黃衣皂
笠金兔鶻帶以青黃旗二導前黃繖擁後從者二三百
人馬五十餘匹而已行次城中僧道父老拜伏道左上
遣近侍諭以國家涵養汝輩百有餘年今朕無德令爾
塗炭朕亦無足言者汝輩無忘祖宗之德可也皆呼萬
歲泣下留一日進毫之南六十里避雨雙溝寺中蒿艾

滿目無一人迹上太息白生靈盡矣為之一慟是日小
羅索自息來迂得馬二百已亥入蔡蔡之父老千人羅
拜於道見上儀衛蕭條莫不感泣上亦歔歔者久之乙
卯以鎬為御史大夫總帥如故初鎬守蔡門禁甚嚴男
女樵采必以墨識其面人有以錢出者十取一分有半
以贍軍上至蔡或言其非便即弛其禁時大兵去遠商
販頗集小民鼓舞以為復見太平公私宿釀一日俱盡
郾城土豪盧進殺其長吏自稱招撫使以前關陝帥府

經歷范天保為副至是天保來見進麥三百石及獐鹿
脯茶蜜等物遂賜進金牌加天保官自是進物者踵至
既而遣內侍殿頭宋珪與鎬妻選室女備後宮已得數
人右丞呼沙呼諫曰小民無知將謂陛下駐蹕以來不
聞恢復遠略而先求處女以示久居民愚而神不可不
畏上曰朕以六宮失散左右無人故令採擇今承規誨
敢不敬從止留解文義者一人餘皆放遣是時從官近
侍率皆窮乏悉取給於鎬鎬亦不能人滿其欲日夕交

譖於上甚以尚食闕供為言上怒雖擢拜大夫而名見
特疎小羅索之在息州也與舒穆魯玖珠有隙怨鎬為玖
珠辨曲直及上幸蔡羅索見於雙溝因厚誣鎬罪上頗
信之鎬自知被讒憂憤鬱抑常稱疾在告會前參知政
事實嘉紐勒歡姪大安來以紐勒歡無反狀為官努所
殺白尚書省求改正尚書省以聞上曰朕嘗謂紐勒歡
反邪而無迹可尋謂不反邪朕方暴露遣人徵援兵彼
留精銳自防發其羸弱者以來既到睢陽彼厚自奉養

使朕醢醬有闕朕為人君不當語此細事但四海郡縣
孰非國家所有坐保一城臣子之分彼乃自負而有驕
君上之心非反而何然朕方駕馭人材以其艱難錄功
忘過此其時也其釐正之羣臣知上意之在鎬也數為
右丞仲德言之仲德每見上必稱鎬功業宜令預參機
務又薦以自代上怒少解及參政穆延烏登行省息州
鎬遂以御史大夫權參知政事九月大兵圍蔡鎬守南
面忠孝軍元帥蔡巴爾副之未幾城破被執以招息州

不下殺之烏庫哩先生者本貴人家奴為全真師伴為
狂態裸顛露足綴麻為衣人亦謂之麻帔先生宣宗嘗
召入宮問以秘術因出入長大主家殊有穢迹上微聞
之勅有司掩捕已逃去正大末從鎬來官汝南人皆知
與其妻通而鎬不知生不自安求出鎬為營道宇親率
僧道送使居之車駕將至蔡生欲遁無所往因自言能
使軍士服氣不費糧右丞仲德知其妄乃奏欲如田單
假神師退敵之意授一真人之號旋出奇計北兵信巫

必駭異之或可以有成功參政天綱以為不可遂止復求入見言有詭計可以退敵及見長揖不拜且多言欲出說大帥布展為脫身計時郎中伊喇克忠員外郎王鶚具以向者麻帳為言上怒殺之

贊曰晉劉越石長於撫納短於駕馭以故取敗鈕祐祿納新陳州之事殆類之矣三羅索皆金內族唯大羅索死得其所其兩羅索讒賊人也襄城事急醉不能軍乃遁一死金失政刑一至於是烏庫哩鎬章蔡之請雖非至

謀區區效忠以讒見忌哀宗之明蓋可知矣

張天綱字正卿霸州益津人也至寧元年詞賦進士性
寬厚端直論議醇正造次不少變累官咸寧臨潼令入
補尚書省令史拜監察御史以鯁直聞陞戶部郎中權
左右司員外郎哀宗東幸遷左右司郎中扈從至歸德
改吏部侍郎知元帥官努有反狀屢為上言之上不從
官努果變遂擢天綱權參知政事及從上遷蔡留亳州
適軍變天綱以便宜授作亂者官州賴之以官及蔡轉

御史中丞仍權參政扶溝縣招撫司知事劉昌祖上封
事請大舉伐宋其略云官軍在前饑民在後南踐江淮
西入巴蜀頗合上意上命天綱面詰其蘊藉召與語無
可取者然重違上命且恐閉塞言路奏以為尚書省委
差官護衛鈕祜祿溫緯近侍局直長鈕祜祿色埒默奉御陳
謙權近侍局直長內族泰和四人以食不給出怨言乞
往陳州就食天綱奏令監之出門任所往才出及汝南
岸遇北兵皆見殺時人快之妖人烏庫哩先生者自言

能使軍士服氣可不費糧右丞仲德援田單故事欲假其術以駭敵語在烏庫窪傳上頗然之天綱力辨以為不可遂止且曰向非張天綱幾為此賊所誑軍使舒穆魯和爾者求見仲德自謂有奇計退敵出馬面具如獅子狀而惡別制青麻布為足尾因言北兵所恃者馬而以欲制其人先制其馬如我軍進戰尋少却彼必求追我以馴騎百餘皆此狀仍繫大鈴于頸壯士乘之以突彼騎騎必驚逸我軍鼓譟繼其後此田單所以破燕也天

綱曰不可彼衆我寡此不足恃縱使驚去安保其不復
來乎恐徒費工物祇取敵人笑耳乃罷之蔡城破為宋
將孟珙得之檻車械至臨安備禮告廟既而命臨安知
府薛瓊問曰有何面目到此天綱對曰國之興亡何代
無之我金之亡比汝二帝何如瓊大叱曰曳去明日遂
奏其語宋主召問曰天綱真不畏死耶對曰大丈夫患
死之不中節爾何畏之有因祈死不已宋主不聽初有
司命供狀必欲書虜主天綱曰殺即殺馬用狀為有司

不能屈聽其所供天綱但書故主而已聞者憐之後不知所終

完顏仲德本名呼沙呼海蘭路人少穎悟不羣讀書習策論有文武才初試補親衛軍雖備宿衛而學業不輟中泰和三年進士第歷仕州縣貞祐用兵辟充軍職嘗為大元兵所俘不踰年盡解其語尋率諸降人萬餘來歸宣宗召見奇之授邳州刺史兼從宜增築城壁匯水環之州由是可守哀宗即位遥授同知歸德府事同簽

樞密院事行院於徐州徐州城東西北三面皆黃河而南獨平陸仲德疊石為基增城之半復浚隍引水為固民賴以安正大五年詔關陝以南行元帥府事以備小關及扇車回時北兵叩關仲德適與前帥鄂屯阿里布酌酒更代而兵猝至遂驅而東阿里布素無所守之策為有司所劾罪當死仲德上書引咎以謂北兵越關之際符印已交安得歸罪前帥臣請受戮上義之止杖阿里布而賞其死六年移知鞏昌府兼行總帥府事時陝

西諸郡已殘仲德招集散亡得軍數萬依山為柵屯田積穀人多歸焉一方獨得小康號命明肅至路不拾遺八年四月詔授仲德鞏昌行省及虎符銀印天興元年九月拜工部尚書參知政事行尚書省事於陝州時烏登新敗陝州殘破仲德復立山寨安撫軍民會上以蠟九書徵諸道兵入援行省院帥府往往觀望不進或中道遇兵而潰惟仲德提孤軍千人歷秦藍商鄧擷果菜為食間關百死至汴至之日適上東遷妻子在京師五

年矣仲德不入其家趨見上於宋門問東幸之意知欲北渡力諫云北兵在河南而上遠徇河北萬一無功得完歸乎國之存亡在此一舉願加審察臣嘗屢遣人奏秦鞏之間山巖深固糧餉豐贍不若西幸依險固以居命帥臣分道出戰然後進取興元經略巴蜀此萬全策也上已與博索議定不從然素重仲德且嘉其赴難進拜尚書省右丞兼樞密副使軍次黃陵二年正月車駕至歸德以仲德行尚書省于徐州既至遣人與國用安

通問沛縣卓翼孫璧冲者初投用安用安封翼為東平
郡王璧冲博平公升沛縣為源州已而翼璧仲來歸仲
德畀舊職令統河北諸砦行源州帥府事用安累擢
王德全入援不赴仲德至徐德全大恐求赴歸德仲德
留之遣人納奏帖云徐州重地德全不宜離鎮仲德虛
州廨不居亦無兵衛自防日以觀書為事而德全自疑
益甚二月魚山總領張璪作亂殺元帥完顏呼圖降北
仲德累議討之德全不從即領麾下十許人親勸民兵

得三百人經往魚山而從宜嚴祿已誅讞反正仲德撫
慰軍民而還有曹總領者盜御馬東行制旨諭行省討
之仲德既殺賊德全欲功出己殺曹黨四十八人三月
阿勒楚爾攻蕭縣游騎至徐德全馬悉為所邀仲德時往
宿州德全以失馬故始議救蕭縣遣張元哥苗秀昌率
騎八百以往未及交戰元哥退走北兵掩之皆為所擒
殺之蕭縣遂破四月仲德陽以闕糧往邳州州官出迎
就執德全并其子殺之餘黨之外一無所問闔郡稱快

初完顏呼圖以遥授徐州節度往帥嚴祿軍於永州北
保安鎮時祿以為從宜在碭山數年又得士心呼圖到
軍士不悅二月辛卯夜遂為總領張猷崔振所害吏部
郎中張敏修呼圖下經歷官乃以軍變脅嚴祿降北祿
佯應之陰召永州守陳立副招撫郭昇會諸義軍赴保
安鎮誅作亂者軍夜至祿遣敏修招猷振計事二人不
疑介冑而至及其黨與皆為祿所殺徐州去保安百里
行省聞之來討會祿已反正乃以便宜授祿行元帥左

都監就佩呼圖虎符朝廷復授祿遥領歸德知府兼行
帥府事未幾大元將阿勒楚爾至保安祿夜遁後祿聞
官努變一軍頓徐宿幾一月遂投連水敏脩入徐五
月詔仲德赴德在時官努已變官屬懼為所紿勸勿往
仲德曰君父之命豈辨真偽耶死亦當行尋使者至果
官努之詐六月官努誅詔仲德議遷蔡仲德雅欲奉上
西幸因贊成及蔡領省院事無鉅細率親身為之選士
括馬繕治甲兵未嘗一日無西志近侍左右久困睢陽

幸卽汝陽之安皆娶妻營業不願遷徙日夕爲上言西
行不便未幾大兵梗路竟不果行仲德每深居燕坐瞑
目太息以不得西遷爲恨是月上至蔡命有司修見山
亭及同知衙爲遊息之所仲德諫曰自古人君遭難播
越于外必痛自刻苦貶損然後可以克復舊物況今諸
郡殘破保完者獨一蔡耳蔡之公廨固不及宮闕萬一
方之野處露宿則有加矣且上初行幸已嘗勞民葺治
今又興土木之役以求安逸恐人心解弛不足以濟大

事上遽命止之八月定進馬遷賞格每甲馬一匹或二匹以上遷賞有差自是西山帥臣范真姬汝作等各以馬進凡得千餘匹以穆延烏登領之又遣使分詣諸道徵兵赴蔡得精銳萬人又以器甲不完命工部侍郎珠嘉耀珠監督修繕不踰月告成軍威稍振扈從諸人苟一時之安遂以蔡為可守矣魯山元帥元志領軍千餘來援時諸帥往往擁兵自固志獨冒險數百里且戰且行北至蔡幾喪其半上表異之賜以大信牌升為總帥

息州忠孝軍帥蔡巴爾王善爾亦來援壬午忠孝軍提
控李德率十餘人乘馬入省大呼以月糧不優幾於罵
詈郎中伊喇克忠白之仲德仲德大奴縛德堂下杖之
六十上諭仲德曰此軍得力方欲倚用卿何不容忍責
罰乃爾仲德曰時方多故錄功隱過自陛下之德至于
將帥之職則不然小犯則決大犯則誅強兵悍卒不可
使一日不在紀律蓋小人之情縱則驕驕則難制睢陽
之禍豈獨官努之罪亦有司縱之太過耳今欲更易前

轍不宜愛克厥威賞必由中罰則臣任其責軍士聞之
至于國亡不敢有犯九月蔡城戒嚴行六部尚書富察
世達以大兵將至請諭民併收晚田不及者踐毀之毋
資敵制可丙辰詔裁冗員汰冗軍及定官吏軍兵月俸
自宰執以下至于皂隸人月支六斗初有司定減糧人
頗怨望上聞之欲分軍為三上軍月給八斗中七斗下
六斗人復怨不均乃立射格而上中軍輒多受賞連中
者或面賜酒人益為勸且陰有所增而人不知仲德之

謀也甲子分軍方守四面十月壬申朔大兵壕壘成耀
兵城下旗幟蔽天城中駭懼及暮焚四關夷其牆而退
十一月辛丑大兵以攻具傳城有司盡籍民丁防守不
足則括婦女壯健者假男子衣冠使運木石蔡旣受圍
仲德營畫禦備未嘗一至其家拊存軍士無不得其懽
心將校有戰亡者親為賻祭哭之盡哀己丑西城破城
中前期築柵浚濠為備雖克之不能入也但於城上立
柵南北相去百餘步而已仲德摘三面精銳日夕戰禦

終不能拔三年正月庚子朔大兵以正旦會飲鼓吹相接城中飢窘愁嘆而已圍城以來戰歿者四帥三都尉其餘總帥下不可勝紀至是盡出禁近至於舍人牌印省部掾屬亦皆供役戊申大兵鑿西城為五門整軍以入督軍鏖戰及暮乃退聲言來日復集己酉大兵果復來仲德率精兵一千巷戰自卯及己俄見子城火起聞上自縊謂將士曰吾君已崩吾何以戰為吾不能死亂兵之手吾赴汝水從吾君矣諸君其善為計言訖赴

水死將士皆曰相公能死吾輩獨不能耶於是參政富
珠哩羅索烏凌阿呼圖總帥元志元帥王善爾赫舍哩
栢壽烏庫哩和勒端及軍士五百餘人皆從死焉仲德
狀貌不踰常人平生喜怒未嘗妄發聞人過常護諱之
雖在軍旅手不釋卷門生故吏每以名分教之家貧敝
衣糲食終其身晏如也雅好賓客及薦舉人才人有寸
長極口稱道其掌軍務賞罰明信號令嚴整故所至軍
民為用至危急死生之際無一士有異志者南渡以後

將相文武忠亮始終無瑕仲德一人而已

贊曰金之亡不可謂無人才也若完顏仲德張天綱豈
非將相之器乎昔者智伯死又無後其臣豫讓不忘國
士之報君子謂其無所為而為之真義士也金亡矣仲
德天綱諸臣不變所守豈愧古義士哉

金史卷一百十九

欽定四庫全書

金史卷一百二十

元中書右丞相總裁托克托等修

列傳第五十八

世戚

賈嘉努

費摩達

本名呼達

呼敦

圖克坦恭

本名舍音

烏庫哩富勒呼唐古德溫

本名阿里

烏庫哩尼瑪哈

富察額古德

烏凌阿暉

本名羅歡

富察鼎壽

本名和尙

圖克坦思忠

本名寧慶

圖克坦繹

本名珠巴克

烏凌阿復

本名額哩埒

烏庫哩元忠

子誼

唐古貢

本名達格

烏凌阿琳

本名瑠珠

圖克坦公弼

本名錫林

圖克坦銘

圖克坦肆喜

金昭祖娶圖克坦氏后妃之族自此始見世祖時烏春為難世祖欲求昏以結其驩心烏春曰女直與呼爾哈豈可為昏世宗時賜瓜爾佳清臣族同國人清臣呼爾哈人也然則四十七部之中亦有不通昏姻者矣其故則莫

能詰也有國家者昏姻有恒族能使風氣淳固親義不
渝而貴賤等威有別焉蓋良法也歟作世戚傳

實嘉努富察部人世居按春水祖和勒端世祖外孫
和諾克薩塔之亂昭肅皇后父母兄弟皆在敵境和勒端
以計迎還之實嘉努自幼時撫義于太祖家及長太祖
以女妻之年十五從攻寧江州敗遼主親軍攻臨潢府
皆有功襲穆昆其後自山西護其國王摩囉歡之喪歸
上京道由興中是時方攻興中未下實嘉努置柩于驛

率其所領明安兵助王帥遂破其城從宗望討張覺再
從宗翰伐宋宗朝聞宗望軍已圍汴遣竇嘉努計事抵
平定軍遇敵兵數萬敗之遂見宗望已還報宗翰聞其
平定之戰甚嘉之明年復伐宋竇嘉努隸羅索軍羅索
討陝西未下竇嘉努領所部兵援之既而以本部屯戍
西京會契丹達實出奔以伊都為元帥竇嘉努為副襲
諸部族以還未幾疾退居鄉里天眷間授侍中駙馬
都尉再以都統定邊部熙中賜御書嘉獎之封蘭陵郡

王除東京留守以病致仕卒年六十三加贈鄖王正隆
例奪王爵封魯國公

費摩達本名呼達博勒和部人為人淳直孝友天輔六
年從普嘉努追叛寇於德里州力戰有功熙宗娶呼達
女是為悼平皇后天眷元年授世襲明安明年以皇后
父拜太尉封徐國公皇統元年除會寧牧居數歲以太
尉奉朝請九年悼后死無何海陵殺熙宗欲邀衆譽揚
熙宗過惡以悼后死非罪於是封呼達為王天德三年

薨子忽都為燕京留守以罪免居中都海陵命馳驛赴之及葬使秘書監納哈塔椿年致祭賻銀五百兩

呼敦天眷三年權明安皇海元年為行軍明安歷橫海崇義軍節度使以后戚怙勢贓汙不法其在橫海拜富人為父及死為之行服而分其資在崇義諷寺僧設齋受其施留守中京益驕恣苟可以得財無不為者選諸明安富人子弟為章京規財物時號閑閑君朝廷以呼敦與圖克坦恭等汙濫至甚命秉德黜陟天下官吏

呼敦以賊罷海陵以呼敦所至從家奴擾民乃定禁外官任所閑離人條約天德三年復起為鄭州防禦使改安國軍節度使卒年三十九

圖克坦恭本名舍音天眷二年為奉國上將軍以告烏舍反起授龍虎衛上將軍為戶部侍郎遂出為濟南尹遷會寧牧封譚國公復出為太原尹舍音貪鄙使工繪一佛像自稱嘗見佛其像如此當以金鑄之遂賦屬縣金而未嘗鑄佛盡入其家百姓號為金總管秉德廉訪官

吏舍音以賊免海陵纂立其后圖克坦氏舍音女由是復用為會寧牧封王未幾拜平章政事海陵獵於和爾和水舍音編立圍場凡平日不相能者輒杖之海陵謂宰相曰舍音為相朕非私之今聞軍國大事凡舍音所言卿等一無取豈千慮無一得乎他宰相無以對溫都思忠舉數事對曰某事本當如此舍音輒以為如彼皆妄生異議不達事宜臣逮事康宗累朝宰相未嘗有如舍音專恣者海陵默然舍音於都堂脊杖令史馮仲尹

御史臺劾之海陵杖之二十舍音明安部人薩克蘇者
言舍音强率取部人財物海陵命侍御史博囉鞠之博
囉鞠不以實海陵杖博囉而以薩克蘇為符寶祗候改
隸哈濟明安舍音兄定格尚太祖長女烏嚕定格死無
子以季弟子扎拉為後舍音謀取其兄家財物强納烏
嚕為室而不相能烏嚕嘗詈舍音舍音妾呼達與烏
嚕不叶乃譖烏嚕於海陵圖克坦后曰烏嚕怨上殺其
兄宗敏有怨望語會韓王亨改廣寧尹諸公主宗婦往

賀其母烏嚕以言慰亨母呼達亦以怨望指斥誣烏嚕
海陵使蕭裕鞠之呼達得幸于圖克坦后左驗皆不敢言
遂殺烏嚕舍音乃盡奪扎拉家財大定間皆追正之
海陵以烏嚕有怨望語舍音不奏遂杖舍音免所居官
俄復為司徒進拜太保領三省事兼勸農使再進太師
封梁晉國王貞元二年九月舍音從海陵獵于順州方
獵間舍音薨即日罷獵臨其喪親為擇葬地遣使營治
及葬賜輜輶車上及后率百官祭之賜諡曰忠正隆間

改封趙國公再進齊國公其妻先舍音卒海陵嘗至其
葬所致祭起復其子率府率幹里雅布為諫議大夫大定
間海陵降為庶人圖克坦氏為庶人妻降舍音特進鞏國
公

烏庫哩富勒呼父當堪國初有功富勒呼通契丹大小
字娶宋王宗望女昭寧公主實庫熙宗初為護衛改牌
印常侍左右轉通進襲父穆昆再遷臨海軍節度使改
衛州防禦使海陵賜食內殿謂之曰衛州風土甚佳勿

以防禦為降也對曰頗聞衛州官署不利守者即日改汾陽軍節度使賜衣服佩玉帶劔入為太子詹事卒年四十一海陵親臨哭之后妃皆弔祭賻贈甚厚有司給喪事贈特進駙馬都尉正隆例贈光祿大夫

唐古特溫本名阿里上京刷河人也曾祖寶庫從太祖平拉必瑪察領穆昆祖特伯烈領其父穆昆從太祖伐遼攻寧江泰州戰有功父達蘭尚康安女從宋王宗望以軍二萬收平州至城東十里許遇敵兵甚衆戰敗之

太祖賞賚甚厚授行軍明安皇統初遷龍虎衛上將軍
歷興平臨海等軍節度使德溫善射尚睿宗皇帝女楚
國長公主天眷三年授宣武將軍皇統元年從都元師
宗弼南征以善突戰遷廣威將軍六年遷定遠大將軍
七年授殿前右副都點檢天德初改殿前左副都點檢
遷兵部尚書出大名尹兼本路兵馬都總管官改橫海
軍節度使延安尹兼鄜延路兵馬都總管世宗即位封
道國公為殿前都點檢駙馬都尉大定二年以父祖功

授按春明安所管世襲穆昆三年九月九日世宗以故
事出獵謂德溫曰扈從軍士二千人飲食芻秣能無擾
百姓乎嚴為約束仍以錢一萬貫分給之四年為勸農
使出為西京留守賜犀弓玉帶召入為皇太子太傅卒
上輟朝親臨喪奠祭賻贈甚厚十八年追錄其父達蘭
并德溫前後功授其長子駙馬都尉鼎世襲西北路摩
哩山明安從隸泰州

烏庫哩尼瑪哈上京和倫屯人也移屯河間祖和勒端

太祖伐遼常侍左右追遼主延禧却夏人援兵皆有功
授世襲穆昆父罕都官至廣威將軍尼瑪哈尚睿宗女
冀國長公主初為護衛天德二年襲穆昆海陵伐宋為
押軍明安世宗即位軍還授侍衛親軍步軍都指揮使
加駙馬都尉歷左副點檢禁直被酒不親視屬鐸杖四
十遷右宣徽使勸農使出為興平軍節度使改廣寧尹
賜錢三千貫尼瑪哈至廣寧嗜酒不視事上以兵部員
外郎宗安為少尹詔宗安戒諭之上謂宗安曰汝能繼

修前政朕不忘汝勉之大定中尼瑪哈卒上聞之遣其子駙馬都尉公說馳驛奔喪賜錢三千貫沿路祭物並從官給

富察額古德初授信武將軍尚海陵姊遼國長公主都本為駙馬都尉遼國薨繼尚鄧國長公主催格皇統三年為右副點檢五年使宋為賀正旦使改左副檢檢禮部工部尚書廣寧咸平臨潢尹武定軍節度使封葛王薨年二十八海陵親臨葬贈諱王正隆例贈特進楚國

公

烏凌阿暉本名摩囉歡明德皇后兄也天眷初充護衛
以捕宗磐宗雋功授忠勇校尉遷明威將軍從宗弼北
征遷廣威將軍賞以金幣尚廐擊毬馬久之除殿中侍
御史再除布沙堪群牧使謹畜牧不事遊宴孳產蕃息
進秩改特們群牧使世宗即位召見行在除中都兵馬
都指揮使世宗至中都將遣使於宋以暉為使世宗曰
暉嘗私用官錢五百貫迺數其罪而罷之遣高忠建往

因謂宰臣曰朕於賞罰毫髮無所假借果公廉辦治雖素所不喜必加升擢抵冒公法雖至親亦不少恕遷都點檢兼侍衛親軍副都指揮使卒遣官致祭皇太子都王百官會喪賻銀千兩重綵四十端絹四十匹詔以暉第三子天賜世襲納琳河明安親管穆昆

富察鼎壽本名和尚上京和碩河人欽懷皇后父也賦性沉厚有明鑒通契丹漢字長於吏事尚熙宗女鄭國公主貞元三年以海陵女弟慶宜公主子加定遠大將

軍為尚衣局使累官器物局使大定二年加駙馬都尉
職如故歷符寶郎蠡州刺史濬州防禦使有惠政兩州
百姓刻石紀之遷泰寧軍節度使歷東平府橫海軍入
為右宣徽使改左宣徽授中都路溫圖瑋山明安和碩
穆丹世襲穆昆改河間尹號令必行豪左屏跡有宗室
居河間侵削居民鼎壽奏徙其族于平州郡內大治卒
官上聞之深加悼惜喪至香山皇太子往奠百官致祭
賻銀綵絹明昌三年以皇后父贈太尉越國公鼎壽既

世連姻戚女為皇后長子希卜蘇凡三尚定國景國道國公主其寵遇如此未嘗以富貴驕人當時以為外威之冠云

圖克坦思忠字良弼本名寧慶曾祖薩布尚景祖女從太祖伐遼戰歿臨潢之渾河父賽音尚熙宗妹正隆末為紇斡羣牧使契丹賊斡罕擾北邊賽音與戰死之大定初贈金吾衛上將軍思忠通敏有才頗通經史世宗在潛邸撫養之賦性寬厚十有二歲從上在濟南一日

與姻戚公子出遊近郊有醉人腰弓矢策馬突過諸公
子怒欲鞭之思忠曰醉人昏昧又何足責遂釋之其人
行數十步忽執弓矢思忠恐上人速馳至其傍奪其
弓弛而還之上聞之嘉有識量由是常使侍側尚皇第
二女唐國公主大定初世宗使思忠迎南征萬戶高忠
建完顏福壽于遼口察其去就思忠知其誠意乃與俱
至東京世宗即位如中都思忠從行軍國庶事補益弘
多大定元年十月拜殿前左衛將軍二年加駙馬都尉

卒上為輟朝即喪所臨奠命有司備禮葬之營費從官
給十九年上追念思忠輔立功贈驃騎衛上將軍仍授
其子鐸武功將軍世襲中都路溫圖琿穆昆

圖克坦繹本名珠巴克其先上京阿勒楚喀達人祖薩
噶爾瑪克國初有功授隆安府路哈濟穆昆多科阿林
明安繹美姿儀通諸國語尚熙宗第七女瀋國公主充
符寶祇候遷御院通進授符寶郎歷宣德泰安淄州刺
史有廉名改同知廣寧府事以母鄂國公主憂不赴世

宗特許以憂制中襲父封服闋授同知濟南府事二十六年遷棣州防禦使以政迹聞升臨海軍節度使卒經家世貴寵自曾祖繹尚公主者凡四世云

烏凌阿復本名額哩埒東平人也奉御出身大定七年尚世宗第七女宛國公主授駙馬都尉改引進使兼符寶郎出為蠡州刺史三遷歸德軍節度使明昌三年轉知興中府事久之為海蘭路兵馬都總管承安四年拜絳陽軍節度使卒

烏庫哩元忠本名額哩頁其先上京特卜庫人父額琳
尚太祖女畢國公主元忠幼秀異世宗在潛邸以長女
妻之後封魯國大長公主正隆末從海陵南伐世宗即
位遼陽時太保昂為海陵左領軍大都督遣元忠朝于
行在遂授定遠大將軍擢符寶郎諭之曰朕初即位親
密無如汝者侍從宿衛宜戒不虞大定二年加駙馬都
尉除近侍局使遷殿前左衛將軍從世宗獵上欲射虎
元忠諫止之進殿前右副都點檢為賀宋正旦使還轉

左副都檢檢坐家奴結攬民稅免官十一年復舊職明年升都點檢十五年北邊進獻命元忠往受之及還詔諭曰朕每遇卿直宿其寢必安今夏幸景明宮卿去久朕甚思之會大興府守臣闕遂以元忠知府事有僧犯法吏捕得寘獄皇姑梁國大長公主屬使釋之元忠不聽主奏其事世宗詔謂曰卿不徇情甚可嘉也治京如此朕復何憂秩滿授吏部尚書以其子誼尚顯宗長女薛國公主十八年擢御史大夫授薩巴山世襲穆昆世

宗問左丞相赫舍哩郎弼執可相者良弼以元忠對乃
拜平章政事封任國公進尚書右丞相策論進士之科
設元忠贊成之世宗將幸會寧元忠進諫不聽出知真
定府尋復詔為右丞相世宗欲覽上京城元忠曰此邦
遭正隆軍興百姓凋弊陛下休養二十餘年尚未完復
況土性疎惡斃之恐難經久風雨摧壞歲歲繕完民將
益困矣駕東幸久之未還元忠奏曰鸞輿駐此已閱歲
倉儲日少市買漸貴禁衛暨諸局署多逃者有司捕寘

諸法恐傷陛下仁愛世宗嘉納之尋出為北京留守責諭之曰汝強悍自用覬權而結近密汝心叵測其速之官後左丞張汝弼奏事世宗惡其阿順謂左右曰卿等每事依違苟避不肯盡言高爵厚祿何以勝任如烏庫哩元忠為相剛直敢言義不顧身誠可尚也於是改知真定府事移知河間明昌二年知廣寧府以河間修築越場擾民會赦下除順義軍節度使乞致仕不許特加開府儀同三司北京留守徙知濟南府過闕令預晏班

平章政事之上永安二年移守南京尋改知彰德府卒
計聞上遣宣徽使白琬燒飯賄物甚厚元忠素貴性麤
豪而內深忌世宗嘗責之又所至不能戢奴僕世以此
為訾云子誼

誼本名雄名大定八年尚海陵女宴宗室及六品以上
官命婦預焉上曰此女亦太祖之曾孫猶朕之女乃父
廢亡非其女之罪也海陵女卒大定二十一年尚顯宗
女廣平郡主誼歷仕宮衛為人麤豪類其父二十六年

上謂原王曰元忠物望其可復相也雄名又不及乃父
朕嘗宥待殊不知恩汝宜知其為人謂平章政事襄曰
雄名可令補外自掖宮已有旨補外者比及比及延授
即每令入宮於是誼除同知澄州軍州事章宗即位廣
平郡主進封鄴國長公主誼改順天軍節度副使加駙
馬都尉承安元年累遷秘書監兼吏部侍郎改刑部遷
工部尚書泰和元年遇父元忠憂二年以本官起復三
年知東平府事改知真定府事六年伐宋遷元帥左都

監七年轉左監軍八年拜御史大夫大安中知大名府
至寧初以謀逆伏誅

唐古貢本名格哥太傅阿里之子也尚世宗第四女吳
國公主授駙馬都尉充奉御特授拱衛直副都指揮使
五遷刑部侍郎坐擅離職削官一階出為德州防禦使
升順天軍節度使移鎮橫海名為左宣徽使遷兵部尚
書改吏部轉禮部尚書兼大理卿先是大理卿闕世宗
命宰臣選可授者左丞張汝弼舉西京副留守楊子益

法律詳明上日子益雖明法而用心不正豈可任之以
分別天下是非也大理湏用公正人右丞鈕祜祿額特
埒舉貢可任以閑簡部分兼領是職遂以貢為之二十
八年拜樞密副使章宗立為御史大夫會貢生日右丞
相襄參知政事劉瑋吏部郎中膏中都兵馬都指揮使
和喜為貢壽遂犯夜禁和喜遣軍人送襄至第監察御
史圖克坦德勝劾奏下刑部逮膏等問狀上以襄瑋大
臣釋之而貢等各解職尋知大興府事復為樞密副使

乞致仕不許進樞密使封莘國公改封蕭復上表乞退
上曰向已嘗告續知意欲外除今之告將復若何遂優
詔許之尋起知真定府事泰知二年薨

烏凌阿琳本名瑠珠尚部國公主加駙馬都尉貞祐元
年為靜難軍節度使夏人犯邠州琳降知延安府遣通
事張福孫至夏國夏人使福孫見琳時已中風公主令
人以狀付福孫屬以懇禱朝廷冀早太平得還鄉之意
福孫具以聞詔賜以藥物

圖克坦公弼本名錫林河北東路算卓和明安人父富均努尚熙宗女加駙馬都尉終武定軍節度使公弼初充奉御大定二十七年尚世宗女息國公主加定遠大將軍駙馬都尉改器物局直長轉副使兼近侍局直長丁父憂起復本局副使章宗秋出射虎虎怒突而前侍衛皆避去公弼不動虎亦隨斃詔責侍衛而尉諭公弼除濱州刺史再遷兵部侍郎累除知大名府事是時伐宋軍興有司督逋租及牛頭稅甚急公弼奏軍士從戎

民亦疲弊可緩徵以紓民朝廷從之大安初知大興府
事讞武清盜疑其有寃已而果獲真盜歲餘拜參知政
事進右丞轉左丞至寧初拜平章政事封定國公貞祐
初進拜右丞相罷知中山府事是時中都圍急不可行
圍解宣宗曰中山新被兵不如河中善乃改知河中府
歷定國軍節度使事太孫太師同判大睦親府事興定
五年薨宣宗輟朝賻贈諡恪愍

圖克坦銘字國本顯宗賜名重泰祖貞有傳父特進涇

國公性重默寡言粗通經史事母盡孝大定末充奉御
章宗即位特勅襲中都路歡塔山明安明昌五年授尚
醞署直長累遷侍儀司令宿直將軍尚衣局使兵部郎
中與大理評事孫人鑑為採訪使覆按提刑司事改右
衛將軍轉左衛出為永定軍節度使移河南北路按察
使轉運使大安三年改知大名府就陞河北東西大名
路安撫使大名荐饑重困銘乞大出交鈔以振之崇慶
初移知真定府復充河北東西大名路宣撫使至寧元

年九月奉迎宣宗于彰德府俄拜尚書右丞出為北京
留守以路阻不能赴貞祐二年卒

贊曰天子娶后王姬下嫁豈不重哉秦漢以來無世世
甥舅之家關雎之道缺外戚驕盈何彼穠矣不作王姬
肅雝之義幾希矣古者異姓世爵公侯與天子為昏
姻他姓不得參焉女為皇后已尚王姬而自貴其貴富
厚不加焉寵榮不與焉使漢唐行此道則無呂氏王氏
武氏之難公主下嫁各安其分各得其所矣金之圖克坦

納刺唐古富察費摩赫舍哩布薩皆貴族也天子娶后必于是公主下嫁必于是與周之齊紀無異此昏禮之最得宜者盛於漢唐矣

圖克坦肆喜哀宗皇后之弟也天興二年正月辛酉夜肆喜內侍馬福惠至自歸德時河朔已失利京城猶未知二人被旨迎兩宮遂託以報捷執小黃旗以入至則奏兩宮以奉迎之意是日召二相入議二相及烏克遜納新諫不可行肆喜作色曰我奉制旨迎兩宮有敢言不

行者當以別勅從事矣二相不復敢言行議遂決制旨
所取兩宮柔妃費摩氏及令人張秀葉都轄承御湯藥
皇乳母鞏國夫人等十餘人外皆放遣之又取宮中寶
物馬蹄金四百枚大珠如粟黃者七千枚生金山一龍
腦板二及信瑞御璽仍許賜忠孝軍以兩宮隨行物之
半丙寅太后御仁安殿出錠金及七寶金洗分賜忠孝
軍是夜兩宮騎而出至陳留見城外二三處火起疑有
兵遲回問納新初不欲行即承太后旨馳還丁卯入京

頓肆喜家少頃還宮復議以是夜再往太后憊於鞍馬不能動遂止明日崔立變肆喜珠嘉塔克實布及塔克實布之父耀珠肆喜妻完顏氏以忠孝卒九十七騎徑奪曹門往歸德不得出轉陳州門亦為門卒所止門帥裕州防禦何阿布哈綏赫已遁經歷官完顏和卓權帥職麾門卒放塔克實布等去且曰罪在我非汝等之過明日立以數十騎召和卓和卓自分必死易衣冠而往立左右扼腕欲加刃立遙見問汝是放忠孝軍出門者

耶和卓曰然天子使命某實放之罪在某立忽若有所省顧羣卒言此官人我識之前築裏城時與我同事我所部十餘卒盜官木罪當死此官人不之問但笞數十而已此家能殺人能救人因好謂和卓曰業已放出吾不汝罪也肆喜等至歸德上驚問兩宮何如二人奏京城軍變不及入宮上曰汝父汝妻獨得出耶下之獄皆斬於市

贊曰肆喜奉迎兩宮而值崔立之變智者居此與兩宮

周旋兵間以俟事變之定而徐圖之萬一不然以一死
徇之耳他無策也四喜奉其私親以歸而望人主貸其
死豈非愚乎

金史卷一百二十

欽定四庫全書

金史卷一百二十一

元中書右丞相總裁托克托等修

列傳第五十九

忠義一

華沙布

薩巴附

特庫

布古德

綽哈附

鈕祐祿罕努

曹珪

溫特赫布敦

鶴壽附

額哩頁

閔孫史大等附

納喇綽奇

魏全

珊延

實古納附

瓜爾佳守中

本名阿多

舒穆魯元毅

本名舒蘓

伯特梅和尚

烏克遜溫屯

高守約

哈薩喇安禮

本名酌

王維翰

伊喇古尼

宗宸

烏庫哩榮祖

本名福興

烏庫哩仲溫

本名呼喇

玖

珠
布格蘇附

李演

劉德基

王毅

王晦

牛斗附

齊鷹揚

楊敏中高乞驢附

珠嘉佛新

伊扎爾濟色寶芳努附

高錫

樂共子曰民生於三事之如一唯其所在則致死焉公

卿大夫居其位食其祿國家有難在朝者死其官守郡
邑者死城郭治軍旅者死行陣市井草野之臣發憤而
死皆其所也故死得其所則所欲有甚於生者焉金代
褒死節之臣既贈官爵仍錄用其子孫貞祐以來其禮
有加立祠樹碑歲時致祭可謂至矣聖元詔修遼金宋
史史臣議凡例凡前代之忠於所事者請書之無諱朝
廷從之嗚呼仁哉聖元之為政也司馬遷記豫讓對趙
襄子之言曰人主不掩人之美而忠臣有成名之義至

哉斯言聖元之為政足為萬世訓矣作忠義傳

華沙布完顏部人年三十五從軍頗見任用太祖使富
卦刺往遼國請阿蘇實觀其形勢富卦刺還言遼兵不
知其數太祖疑之使華沙布往還報曰遼方調兵尚未
大集及見統軍使其孫被甲立於傍統軍曰人謂汝輩
且反故為備耳及行道中遇渤海軍渤海軍向華沙布
且笑且言曰聞女直欲為亂汝輩是耶具以告太祖又
曰今舉大事不可後時若俟河凍則遼兵盛集來攻矣

乘其未集而蚤伐之可以得志太祖深然之及破寧江
州戰于達魯噶城皆有功賜以旗鼓并御器械高永昌
請和華沙布往招之取呼圖克以歸高永昌詐降于韓
魯幹魯使華沙布撒巴往報會高禎降言永昌非真降
者幹魯乃進兵永昌怒遂殺華沙布薩巴皆支解之華
沙布就執神色自若罵永昌曰汝叛君逆天今日殺我
明日及汝矣罵不絕口至死年五十九天會中與薩巴
俱贈遙鎮節度使

特庫音德爾水人軀幹雄偉敢戰鬪達嚕噶城之役和
尼陷敵特庫救出之攻昭蘇城遼兵三千來拒特庫先
登敗之攻魯庫營瑪奇墮馬特庫獨殺遼兵數輩掖而
出之賞賚逾渥自臨潢班師至遼河伊都來襲羅索已
引去特庫獨殿馬憊乃步鬪羅索與數騎來救特庫止
之曰我以一死捍敵公勿來俱斃無益遂没于陣皇統
間贈明威將軍

布庫德宗室子初事國相薩哈伐蕭哈里有功與綽哈

俱招降矩威水部族綽哈為穆昆布古德領行軍千戶
從破黃龍府戰于達嚕噶城皆有功寧江州渤海伊色
布叛布古德追復之天輔五年九月綽哈布古德往拜
格河籍軍馬矩威水部錫勒哈塔等七人殺綽哈布古
德投其尸水中俱年四十三太祖悼惜遣使弔賻加等
六年正月斡魯伐錫勒哈塔于希爾根河追及于哈達
拉山殺四人撫定餘衆詔斡魯求綽哈布古德尸以葬
天眷中贈綽哈奉國上將軍布古德昭義大將軍綽哈

亦宗室子也年十五隸軍從太祖伐遼率屯路兵招撫薩木丹錫里肯巴噶三水拜格城邑皆降之敗室韋五百于阿爾噶城獲其民衆至是死焉

鈕祜祿罕努以護衛從宗弼征伐賜鎧甲弓矢戰馬初太祖入居庸關遼林牙耶律達實自古北口亡去其衆來襲奉聖州壁于龍門東二十五里羅索往取之獲達實并降其衆宗望襲遼主輜重于青塚以達實為鄉導詔曰遼趙王實訥埒林牙達實北王喀勒札節度使額

哩埒貝勒徹格爾招討達魯詳袞祿錦同知哈里及諸
官民並釋其罪復詔幹魯曰林牙達實雖非降附其為
鄉導有勞可明諭之時天輔六年也既而亡去不知所
往天會二年遼詳袞托卜嘉來降言達實稱王於北方
署置南北面官僚有戰馬百匹畜產甚衆詔曰追襲遼
主必酌事宜而行政討達實須俟報下三年都統完顏
希尹言聞夏人與耶律達實約曰大金既獲遼主諸軍
皆將歸矣宜合兵以取山西諸部詔荅曰夏人或與達

實合謀為釁不可不察其嚴備之七年泰州路都統博勒和奏達實已得北部二營恐後難制且近羣牧宜列屯戍詔答曰以二營之故發兵諸部必擾當謹斥候而已八年遣耶律伊都實嘉努巴爾斯追討達實徵兵諸部諸部不從實嘉努至烏納水而還伊都報元帥府曰聞耶律達實在和州之域恐與夏人合當遣使索之夏國報曰小國與和州壤地不相接且不知達實所往也皇統四年回紇遣使入貢言達實與其國相鄰達實已

死詔遣罕努與其使俱往因觀其國風俗加武義將軍
奉使達實罕努去後不復聞問大定中回紇伊錫蘭三
人至西南招討司貿易自言本國回紇緞料番部所居
城名特古斯鄂爾多其俗業農無兵器所獲十分之一
輸官耆老相傳先時契丹至不能拒因臣之契丹所居
屯營乘馬行自旦至日中始周匝近歲契丹使其女婿
阿卜薩領兵五萬北攻頁布年等部族不克而還至今
相攻未已詔曰此人非隸朝廷番部不須發遣可於咸

平府舊有回紇人中安置毋令失所而已是歲展盤君長薩里罕托色率喀喇部長貝歡及戶三萬餘求內附乞納前達實所降牌印受朝廷牌印詔西南招討司遣人慰問且觀其意圖哩伊都通事阿魯岱至其國見薩里罕具言願歸朝廷乞降牌印無他意也因曰往年大國嘗遣釵祜祿罕努自和州徃使達實既入其境達實方適野與罕努相遇問罕努何人敢不下馬罕努曰我上國使也奉天子之命來招汝降汝當下馬聽詔達實曰

汝單使來欲事口舌邪使人摔下使罕努跪罕努罵曰
反賊天子不忍於爾加兵遣招汝爾縱不能面縛請罪
闕下亦當盡敬天子之使乃敢反加辱乎達實怒乃殺
之此時達實林牙已死子孫相繼西方諸部仍以達實
呼之伊都阿嚕岱還奏并奏罕努事世宗嘉罕努忠節
贈昭毅大將軍召其子永和縣商酒都監尚和汝州巡
檢羅索諭之曰汝父奉使萬里不辱君命能盡死節朕
甚閔之以尚和為尚輦局直長遷武義將軍羅索為武

器署直長

曹珪徐州人大定四年州人江志作亂珪子弼在賊黨中珪謀誅志并弼殺之尚書省議當補二官雜班叙詔曰珪赤心為國大義滅親自古罕聞也法雖如是然未足以當其功更進一官正班用之

溫特赫布敦為烏哲羣牧使西北路契丹薩巴等反諸羣牧皆應之布敦聞亂作選家奴材勇者數十人給以兵仗陰為之備賊不得發乃給諸奴曰官閱兵器願借

兵仗以應閱諸奴以為實然遂借與之明旦賊至布敦
無以禦之賊執布敦而問之曰今欲反未布敦曰吾家
世受國厚恩子姪皆仕宦不能從汝反而累吾族也賊
怒鬻而殺之子與孫皆與害是時達斡羣牧使圖克坦
色副使特嘉和碩台伊囉斡羣牧使鶴壽額勒本羣牧使
完顏珠勒呼副使完顏希卜蘇布塔布部副使特嘉和
色里蘇穆坦纛詳袞瓜爾佳邁珠呼敦纛詳袞完顏蘇瑪
喀錫默纛詳袞高彭祖等皆遇害鶴壽鄚王昂子本名

烏達布五院部人老和尚率衆來招鶴壽與俱反鶴壽
曰吾宗室子受國厚恩寧殺我不能與賊俱反遂與二
子皆被殺

額哩頁契丹人為尚廐局直長大定初招諭契丹幹罕
叱令額哩頁跪見額哩頁不從謂曰我朝廷使也豈可
屈節於汝汝等早降可全性命若大軍至汝輩悔將何
及幹罕怒曰汝本契丹人而不我從敢出是言遂害之
從行驍騎軍士閏孫史大習馬實達爾博多皆被害三

年贈額爾頁宣武將軍錄其子阿卜薩為外帳實達爾
閏孫史大皆贈修武校尉博多贈忠翊校尉

納喇綽奇咸平路雅哈河明安人契丹瓜里使人招之
綽奇不從瓜里兵且至綽奇遂團結旁近村寨為兵出
家馬百餘匹給之教以戰陣擊刺之法相與拒瓜里于
改渡口由是賊衆月餘不得進既而瓜里兵四萬人大
至綽奇拒戰賊兵十倍遂見執轡而殺之詔贈官兩階
二子皆得用廕

魏全壽州人泰和六年宋李爽圍壽州刺史圖克坦義籍城中兵民及部曲廝役得三千餘人隨機拒守堅甚義善撫御得衆情雖婦人皆樂為用同知布埒庫中流矢卒義益勵不衰募人往斫爽營全在選中為爽兵所執爽謂全曰若為我罵金主免若死全至城下反罵宋主爽乃殺之至死罵不絕口布薩揆遣河南統軍判官奇珠及邁格等以騎二千人救壽州去壽州十餘里與爽兵遇奇珠分兩翼夾擊爽兵大破之斬首萬餘級追

奔至城下拔其三柵焚其浮梁羲出兵應之爽兵大潰
赴淮死者甚衆爽與其副田林僅脫身去餘兵脫者十
之四詔遷羲防禦使竒珠同知昌武軍節度使事邁格
河南路統軍判官贈布埒庫昭勇大將軍官其子圖喇
贈全宣武將軍蒙城縣令封其妻為鄉君賜在州官舍
三間錢百萬俟其子年至十五歲收充八貫石正班局
分承應用所贈官蔭仍以全死節送史館鏤板頒諭天
下

珊延宗室子為符寶祗候完顏實古納為護衛十人長至寧元年八月赫舍哩執中作亂入自通玄門是日變起倉猝中外不知所為珊延實古納往天王寺召大漢軍五百人赴難與執中戰於東華門外執中揚言曰大漢軍反矣殺一人者賞銀一錠執中兵衆大漢軍少二人不勝而死須臾執中兵殺五百人殆盡執中死詔削官爵詔曰宣武將軍護衛十人長完顏實古納修武校尉符寶祗候珊延忠孝勇果没于王事實古納贈鎮國

上將軍順州刺史珊延贈宣武將軍順天軍節度副使
嘗從拒戰明安賞錢五百貫穆昆三百貫佛寧散軍二
百貫各遷兩階戰沒者贈賞付其家實古納子尚幼以
八貫石俸給之俟年十五以聞

瓜爾佳守中咸平人本名阿多古大定二十二年進士歷
清池聞喜主簿補尚書省令史除刑部主事監察御史
修起居注轉禮部員外郎大名治中歷嵩涿北京臨洮
路按察副使以憂去官起復同知海蘭路兵馬都總管

府事坐事謫韓州刺史尋復同知平京府事大安二年
為秦州防禦使遷通遠軍節度使至寧末移彰德軍未
行夏兵數萬入鞏州守中乘城備守兵少不能支城陷
官吏盡降守中獨不屈夏人壯之且誘且脅守中益堅
遂載而西至平涼要以招降府人守中佯許至城下即
大呼曰外兵矢盡且遁矣慎勿降夏人交刃殺之興定
元年監察御史郭著按行秦中得其事以聞詔贈資善
大夫東京留守仍收其子鄂摩為筆硯承奉

舒穆魯元毅本名舒蘇咸平府路珠徹埒明安沙埒噶
珊穆昆人以廕補吏部令史再調景州寧津令有劇盜
白晝恣劫為民害元毅以術防捍賊散去入為大理知
法除同知亳州防禦使事使省檄錄陝右五路刑獄無
冤人復委受宋歲幣故事有私遺物元毅一無所受明
昌初驛召為大名等路提刑判官以最遷汾陽軍節度
副使時石嵐間賊黨嘯聚肆行剽掠朝廷命元毅捕之
賊畏而遁元毅追襲盡殪之二境以安遷同知武勝軍

節度使事別郡有殺人者屢鞠不伏元毅訊不數語即具服河東北路田多山坂磽瘠大比時定為上賦民力久困朝廷命相地更賦元毅以三壤法平之民賴其利改彰德府治中尋以邊警授撫州刺史會邊將失守芻糧馬牛焚剽殆盡元毅率吏卒三十餘人出州經畫軍餉卒與敵遇州倅暨從吏堅請還元毅曰我輩責任邊守遇敵而奔其如百姓何縱得自安復何面目朝廷乎遂執弓矢令衆衆感其忠爭為效死元毅力戰射無不

中敵去而復合元毅氣愈厲鏖戰久之衆寡不敵遂遇害時年四十七事聞上深驚悼贈信武將軍召用其子世勛侍儀司承應世勛後登進士第奏名之日上謂宰臣曰此舒蘇子邪歎賞者久之元毅性沉厚武勇過人每讀書見古人忠義事未嘗不嗟歎賞慕喜動顏色故臨難能死所事云

伯特梅和尚泰州人也性鯁直尚氣節正隆五年收克護衛授赫稜羣牧副使未幾復命召為護衛十人長改

尚廐局副使轉本局使轉右衛將軍拱衛使典尚廐者
十餘年積勞特遷官三階除復州刺史明昌初為西北
路副招討使泰州防禦使升武勝軍節度使六年移鎮
崇義軍時有事北邊左丞相瓜爾佳清臣行省于臨潢檄
為副統會敵入臨潢梅和尚暨護衛博克托等領軍逆
擊之敵積陣以待梅和尚直擣其陣殺傷甚衆敵知孤
軍無繼聚兵圍之度不能免乃下馬相背射復殺百餘
人矢盡猶以弓提擊為流矢所中死博克托等皆沒上

聞之震悼詔贈龍虎衛上將軍躡遷十階特賜錢二十萬命以禮葬之物皆官給以其子都努為軍前明安中使護喪就差權同知臨潢府事李達可為勅祭使同知德昌軍節度使事舒穆魯和尚為勅葬使永安五年上諭尚書省曰梅和尚死王事其子都努從軍久有功其議所以酬之乃命為典署丞

烏克遜溫屯上京路人大定末襲明安明昌七年以本兵充萬戶備邊有功除歸德軍節度明使改盤安軍察

廉遷同知率賓路節度使事以憂去官起復歸德府治中遷唐州刺史泰和六年四月宋皇甫斌步騎萬人侵唐州溫屯兵甚少遣泌陽尉博碩布巡檢布希各以五十人乘城拒守兀屯見宋兵在城東北者可破令軍事判官薩克達以精兵百人自西門出繞出東北宋兵營後掩擊之殺數千百人宋兵大亂迨夜乃遁去五月皇甫斌復以兵數萬來攻行省遣泌陽副巡檢納哈塔軍勝救唐州溫屯出兵與軍勝合兵城東北設伏兵以待之

乃分騎兵為三一出一入以致宋兵宋兵陷于淖伏兵發中衝宋兵為二遂大潰追奔至湖陽斬首萬餘級獲馬三百匹宋別將以兵三千來襲遇之竹林寺殪之納谿軍勝手殺宋將取其金帶印章以獻詔遷溫屯同知河南府事軍勝遷梁縣令各進兩階溫屯賞銀三百五十兩重綵十端為右副元帥完顏匡右翼都統匡取棗陽遣溫屯襲神馬坡宋兵五萬人夾水陣以強弩拒岸溫屯分兵奪其三橋自辰至午連拔十三柵遂取神馬

坡從攻襄至漢江溫屯亂流徑度復進一階號平南虎
威將軍宋人請和遷河南副統軍大安初遷昌武軍節
度使副統軍如故遷西南路招討使溫屯御下嚴酷軍
士多亡杖六十除同知上京留守事大安三年將兵三
萬入衛中都遷元帥右都監轉左都監兼北京留守有
功賜金吐鶻重綵十端遷元帥左監軍留守如故貞祐
元年閏月以兵入衛中都詔以兵萬六千人守定興軍
敗溫屯戰沒

高守約字從簡遼陽人大定二十八年進士累官觀州
刺史大元兵徇地河朔郭邦獻已歸順從至城下呼守
約曰從簡當計全家室守約弗顧至再三守約厲聲曰
吾不汝識也城破被執使之跪守約不屈遂死詔贈崇
義軍節度使謚忠敬

哈薩喇安禮字子敬本名酌大名路人穎悟博學淹貫
經史大定二十八年進士至寧末為泰安州刺史貞祐
初山東被兵郡縣望風而遁或勸安禮去之安禮曰我

去城誰與守且避難負國家之恩乎乃團練繕完為禦
守計已而大元兵至戰旬日不能下謂之曰此孤城耳
內無糧儲外無兵援不降無遺類矣安禮不聽城破被
執初不識某為誰或妄以酒監對安禮曰我刺史也何
以諱為使之跪安禮不屈遂以戈撞其胷而殺之詔贈
泰定軍節度使謚堅貞

王維翰字之翰利州龍山人父庭遼季率縣人保縣東
山後以衆降維翰好學不倦中大定二十八年進士調

貴德州軍事判官察廉遷永霸令縣豪欲嘗試維翰設
事陳訴維翰窮竟之遂伏其詐杖殺之健訟衰息歷弘
政獲嘉令佐胥持國治河決有勞遷一階改北京轉運
戶籍判官補尚書省令史除同知保靜軍節度使事檢
括戶籍一郡稱平屬縣有奴殺其主人者誣主人弟殺
之刑部疑之維翰審讞乃微行物色之得其狀奴遂引
服改中都轉運副使攝侍御史奏事殿中章宗曰佳御
史就除侍御史改左司員外郎轉右司郎中布薩揆伐

宋維翰行省左右司郎中泰和七年河南旱蝗詔維翰體究田禾分數以聞七月雨復詔維翰曰雨雖霑足秋種過時使多種蔬菜猶愈於荒萊也蝗蝻遺子如何可絕舊有蝗處來歲宜栽麥諭百姓使知之八年宋人受盟還為右司郎中進官一階上問宋人請和復能背盟否維翰對曰宋主急于政事南兵佻弱兩淮兵後千里蕭條其臣懲韓侂冑蘇師旦無復敢執其咎者不足憂也唯北方當勞聖慮耳久之遷大理卿兼潞王傳同知

審官院事新格教坊樂工階至四品換文武正資服金
紫維翰奏伶優賤工衣縉紳之服非所以尊朝廷也從
之大安初權右諫議大夫三司欲稅間架維翰諫不聽
轉御史中丞無何遷工部尚書兼大理卿改刑部尚書
拜參知政事貞祐初罷為定海軍節度使是時道路不
通維翰舟行遇盜呼謂之曰爾輩本良民因亂至此財
物不惜勿恐吾家盜感其言而去至鎮無兵備鄰郡皆
望風奔潰維翰謂吏民曰孤城不可守此州阻山浮海

當有生地無俱為魚肉也乃縱百姓避難維翰率吏民
願從者奔東北山結營堡自守力窮被執不肯降妻姚
氏亦不肯屈與維翰俱死詔贈中奉大夫姚氏芮國夫
人謚貞潔

伊喇古尼安化軍節度使貞祐初大元兵取密州古
尼乃率兵力戰流矢連中其頸既拔去復中其頰死焉
貞祐三年詔贈安遠大將軍知益州府事

宋辰中都宛平人也正隆五年進士歷辰州寧化州軍

事判官曹王府記室參軍陝西西路轉運都勾判官補
尚書省令史除武定軍節度副使中都右警巡使時固
安縣丞劉昭與部民裴原爭買鄰田原用昭屬抑原使
毋爭御史臺劾奏奪一官解職降廣寧府推官改遼東
路鹽使丁父憂起復吏部員外郎歷蘇曹景州刺史同
知中都路轉運使事遷北京臨潢等路按察使改安國
軍節度使河東南路轉運使御史劾其前任按察侵民
舍不稱職降沂州防禦使移濬州遷山東西路轉運使

改定海軍節度使貞祐二年改沁南軍正月大元兵至懷州城破死焉扈天資刻酷所至不容物以是蹭蹬於世云

烏庫哩榮祖本名福興河間人明昌二年進士歷官補尚書省令史除都轉巡司都勾判官轉弘文校理升中都總管府判官察廉除震武軍節度副使彰德府司馬累遷戶部員外郎寧海州刺史貞祐二年城破榮祖猶力戰死之贈安武軍節度使賜諡毅勇

烏庫哩仲溫本名呼喇蓋州按春明安人大定二十五年進士累官太學助教應奉翰林文字河東路提刑判官改河北東路轉運副使御史薦前任提刑稱職遷同知順天軍節度使事簽上京東京等路按察使事改提舉肇州漕運兼同知武興軍節度使事東勝州刺史坐前在上京不稱職降鎮寧軍節度副使改滑州刺史河東南路按察副使壽州防禦使貞祐初遷鎮西軍節度使是時中都被圍遂至太原移書安撫使賈益謙約以

鄉兵救中都因馳驛如平陽將與蓋謙會于絳不能進
抵平陽而還仲溫嘗治平陽吏民爭留之仲溫曰平陽
巨鎮易為守禦於私計得矣如嵐州何遂還鎮已而大
元兵大至城破不屈而死贈資德大夫博索路兵馬都
總管謚忠毅歲時致祭

玖珠宗室子為武州刺史唐古布格蘇為軍事判官員
祐二年十一月大元兵取玖珠子姪抵城下謂之曰山
東河北今皆降我汝之家屬我亦得已苟不速降且殺

之也玖珠曰當以死報國遑恤家為無何城破力戰而死布格蘇亦不屈死焉詔贈玖珠臨海軍節度使加驃騎衛上將軍布格蘇建州刺史加鎮國上將軍仍令樹碑歲時致祭

李演字巨川任城人泰和六年進士第一除應奉翰林文字再丁父母憂居鄉里貞祐初任城被兵演墨衰為濟州刺史畫守禦策召集州人為兵搏戰三日衆皆市人不能戰逃散演被執大將見其冠服非常且知其名

問之曰汝非李應奉乎演答曰我是也使之跪不肯以
好語撫之亦不聽許之官祿演曰我書生也本朝何負
於我而利人之官祿哉大將怒擊折其脛遂曳出殺之
時年三十餘贈濟州刺史詔有司為立碑云

劉德基大興人貞祐元年特賜同進士出身守官邊邑
夏兵攻城德基坐廳事積薪其傍謂家人曰城破即焚
我及城破其家人不恐縱火遂被執脅使跪降德基不
屈同僚故人紿夏人曰此人素病狂故敢如此德基曰

為臣子當如此爾吾豈狂邪夏人壯其義乃繫諸獄冀其改圖已而召問德基大罵終不能從曰吾豈苟生者哉遂害之贈朝列大夫同知通遠軍節度使事

王毅大興人經義進士累官東明令貞祐二年東明圍急毅率民兵願戰者數百人拒守城破毅猶率衆抗戰力窮被執與縣人王八等四人同驅之郭外先殺二人王八即前跪將降毅以足踏之厲聲曰忠臣不佐二主汝乃降乎驅毅者以刃斫其脛毅不屈而死贈曹州刺史

史

卷一百二十一

王晦字子明澤州高平人少負氣自憙常慕張詠之為人友妻與人有私晦手刃殺之中明昌二年進士調長葛主簿有能聲察廉除遼東路轉運司都勾判官提刑司舉其能轉北京轉運戶籍判官遷安陽令累除簽陝西西路按察司事改平涼治中召為少府少監遷戶部郎中貞祐初中都戒嚴或舉晦有將帥才俾募人自將得死士萬餘統之率所統衛送通州粟入中都有功遷

霍王傳以部兵守順州通州圍急晦攻牛欄山以解通
州之圍賜賚優渥遷翰林侍讀學士加勸農使九月順
州受兵晦有別部在滄景遣人突圍召之衆皆踴躍思
奮而主者不肯發王臻晦之故部曲也免胄出見且拜
曰事急矣自苦何為苟能相從可不失富貴晦曰朝廷
何負汝邪臻曰臻雖負國不忍負公因泣下晦叱曰吾
年六十致位三品死則吾分詎從汝邪將射之臻掩泣
而去無何將士縋城出降晦被執不肯降遂就死初晦

就執謂其愛將牛斗曰若能死乎曰斗蒙公見知安忍
獨生併見殺詔贈榮祿大夫樞密副使仍命有司立碑
歲時致祭錄其子汝霖為筆硯承奉

齊鷹揚淄州軍事判官楊敏中屯留縣尉致仕張乞驢
淄州民貞祐初大兵兵取淄州鷹揚等募兵備禦城破
率衆巷戰鷹揚等三人創甚被執欲降之鷹揚伺守者
稍怠即起奪槊殺數人敏中乞驢皆不屈以死詔贈鷹
揚嘉毅大夫淄州刺史仍立廟于州以時致祭敏中贈


昭勇大將軍同知橫海軍節度使事乞驢特贈宣武將軍同知淄州軍州事

珠嘉佛新薊州明安人官至北京副留守貞祐二年為提控與同知順州軍州事溫特赫伊扎爾俱守密雲縣佛新家屬在薊州大元兵得之以示佛新曰若速降當以付汝否則殺之佛新曰吾事本朝受厚恩戰則速戰終不能降也豈以家人死生為計耶城破死于陣伊扎爾被執亦不屈而死盤安軍節度判官富察濟色與難

澤縣令溫特赫實芳努同守薊州衆潰而出濟色實芳
努死之詔贈佛新開府儀同三司樞密副使封宿國公
伊扎爾鎮國上將軍順州刺史濟色金紫光祿大夫薊
州刺史實芳發鎮國上將軍薊州刺史仍命樹碑以時
致祭

高錫字永之德基子以廕補官積勞調淄州酒使課最
遷萍鄉令察廉遷遼東路轉運度支判官太倉使法物
庫使兼尚林署直長提舉都城所歷北京遼東轉運副

使同知南京路轉運使事貞祐初累遷河北東路按察
轉運使城破遂自投城下而死



金史卷一百二十一

欽定四庫全書

史部

金史卷一百二十一

五

詳校官國子監祭酒

臣 覺羅喜

內閣中書

臣

李彤覆勘

總校官舉人

臣 章維桓

校對官編修

臣 高棧生

謄錄監生

臣

劉筠

欽定四庫全書

金史卷一百二十二

元中書右丞相總裁托克托等修

列傳第六十

忠義一

吳僧格

烏古哩德升

本名魯爾錦

張順

馬驥

伯特烏格

鄂屯醜和尚

蘇爾坦

郭用

富珠哩福壽

吳邦傑

納哈塔富拉塔

鈕祜祿恩楚

王謹附

時茂先

溫特赫老爾

梁持勝

費摩薩布
韓公恕附

賈邦憲

伊喇阿里哈

孔祖湯附

完顏魯爾錦

赫舍哩鶴壽

富察羅索

鈕祜祿資祿

趙益

侯小叔

王佐

洪果玖珠

烏凌阿奇珠

圖們色埒默

瑪哈富勒呼

烏雅威赫

烏雅恩徹亨

鈕祜祿貞

本名綽哈

吳僧格西南路唐古伊喇紉珊舍音部落人拳勇善騎

射大安間選籍山西人為兵僧格充馬軍千戶有功貞祐初遷萬戶權順義軍節度使朔州失守僧格復取之真授同知節度使事弟權同知節度使事達剌真授節度副使權節度副使燕綽爾真授節度判官提控馬壽兒以下遷授有差衆苦乏食僧格乞賜糧十五萬斛朝廷以為應州已破朔為孤城其勢不可守乃遷朔之軍民九萬餘口分屯於嵐石隰吉絳解之間未行大元兵至朔州戰七晝夜有功加遙授同知太原府事兼同知

節度使事達喇石州刺史綽爾同知岢嵐州防禦使事
四年始遷其民南行且戰且行者數十里僧格力憊馬
躓死焉時年三十詔贈鎮國上將軍順義軍節度使

烏庫哩德升本名魯爾錦益都路明安人明昌二年進士
累官補尚書省令史知管差除除吏部主事絳陽軍節
度副使丁父憂起復太常博士東平治中大安初知弘
文院改侍御史論西京留守赫舍哩執中姦惡衛紹王
不聽遷肇州防禦使宣宗遷汴召赴闕上言泰州殘破

東北路招討司明安穆昆人皆寓于肇州凡徵調往復甚難乞升肇州為節度使以招討使兼之置招討副使二員分治泰州及宜春詔從之進翰林侍讀學士兼戶部侍郎俄以翰林侍讀權參知政事與平章政事穆延盡忠論近侍局預政宣宗怒語在盡忠傳無何出為集慶軍節度使改汾陽軍節度使河東北路宣撫副使復改知太原府事權元帥左監軍興定元年大元兵急攻太原糧道絕德升屢出兵戰糧道復通詔遷官一階德

升上言皇太子聰明仁孝保訓之官已備更宜選德望素著之士朝夕左右之日聞正言見正行此社稷之洪休生民之大慶也宣宗嘉納之二年真授左監軍行元帥府事大元兵復圍太原環之數匝已破濠垣德升植柵為拒出其家銀幣及馬賞戰士北軍壞城西北隅以入德升聯車塞之三却三登矢石如雨守陴者不能立城破德升至府署謂其姑及其妻曰吾守此數年不幸力窮乃自縊而死其姑及其妻皆自殺詔贈翰林學士

承旨子烏蘭威尚幼詔以奉御俸養之

張順淄州士伍淄州被圍行省侯摯遣總領提控王庭
玉將兵救之庭玉募順等三十人往覘兵勢且欲令城
中知援兵之至乘夜潛至城下順為所得執之使宣言
行省軍敗績庭玉亦死宜速降順陽許諾既乃呼謂城
中曰外兵無多王節度軍且至堅守毋降兵力交下順
曰得為忠孝鬼足矣遂死淄人知救兵至以死守城賴
以完後贈宣武將軍同知棣州防禦使事詔有司給養

其親且訪其子孫優加任用

馬驤禹城人也登進士歷官有聲貞祐三年為曹州濟陰令四月大元克曹州驤被執軍卒撈掠求金驤曰吾書生何從得是又使跪驤曰吾膝不能屈欲殺即殺得死為大金鬼足矣遂死贈朝列大夫泰定軍節度副使仍樹碑于州時致祭貞祐四年七月詔以其男惟賢于八貫石局分收補

伯特烏格西南路茂弘奚人壯健沉勇大元兵克西南

路鄰郡皆降烏格獨不屈貞祐五年東勝州已破烏格
與頁里雅勒呼頁里雅爾招集義軍披荆棘復立州事河
東北路行元帥府承制除烏格武義將軍寧遠軍節度
副使頁里雅勒呼武義將軍節度判官頁里雅爾武義將
軍觀察判官烏格等以恩不出朝廷頗懷觖望縱兵剽
掠興定元年詔烏格遙授武州刺史權節度使頁里雅勒
呼權同知節度使事頁里雅爾權節度副使各遷官兩
階興定三年烏格特遷三官遙授同知晉安府事尋直

授東勝軍節度使東勝被圍城中糧盡援兵絕烏格率衆潰圍走保長寧寨詔各進一官戰沒者贈三官九月復被圍烏格死之

鄂屯醜和尚為代州經畧使貞祐四年八月大元兵攻代州醜和尚禦戰敗績身被數創被執欲降之不屈遂死蘇爾坦宗室子大安中充尚書省祇候郎君貞祐二年自募義兵數千充宣差都提控詔從提舉奉先范陽三都統兵除同知涿州事遷刺史佩金牌經畧海州旋亦

宣差都提控安撫山西軍民應援中都上書曰絳解二
州僅能城守而村落之民皆嘗被兵重以連歲不登人
多艱食皆恃鹽布易米今大陽等渡乃不許粟麥過河
願罷其禁官稅十三則公私皆濟矣又曰絳解河中必
爭之地惟令寶昌軍節度使從宜規畫鹽池之利以實
二州則民受其利兵可以強矣又曰中條之南垣曲平
陸芮城虞鄉河東之形勢陝洛之襟喉也可分陝州步
騎萬二千人為一提控四都統分戍四縣此萬全之策

也又曰平陸產銀鐵若以鹽易米募工鍊冶可以廣財
用備戎器小民傭力為食可以息盜又曰河北貧民渡
河逐食已而復還濟其饑者艱苦殊甚苛暴之吏抑止
誅求弊莫大焉又曰河南陝西調度未急擇騎軍牝馬
羣牧不二三年可增數萬騎軍勢自振矣又曰諸路印
造寶券久而益多必將積滯止於南京印造給降庶可
久行又曰河北職任雖除授不次而人皆不願者蓋以
物價十倍河南祿廩不給饑寒且至若實給俸粟之半

少足養廉則可責其効力又曰河北之官朝廷減資遷秩躡等以答其勞聞河南官吏以貶逐目之彼若以為信然誰不解體書奏下尚書省議惟許放大陽等渡宣撫司量民力給河北官俸目河北為貶所者有禁而已四年行樞密院于河南府上書曰用兵累年出輒無功者兵不素勵也士庶且充行伍况於皇族與國同休戚哉皆當從軍親冒矢石為士卒先少寬聖主之憂族人道格實同此心願隸臣麾下宣宗嘉其忠許之興定元

年改輝州刺史權河平軍節度使孟州經畧使初御史大夫權尚書右丞永錫被詔經畧陝西宣宗曰敵兵強則謹守潼關毋使得東永錫既行留澠池數日至京兆駐兵不動頃之潼關破大元兵次近郊由是永錫下獄久不決蘇爾坦上疏救之畧曰竊聞周祚八百漢享國四百餘載皆以封建親戚犬牙相制故也孤秦曹魏亡國不永晉八王相魚肉猶歷過秦魏自古同姓之親未有不與國存亡者本朝呼沙呼之難百僚將士無敢誰

何珊廷實古納奮身拒戰盡節而死御史大夫永錫才
不勝任而必用之是朝廷之過也國之枝葉已無幾矣
伏惟陛下審圖之於是宗室四百餘人上書論永錫皆
不報久之永錫杖一百除名當是時諸路兵皆入城自
守百姓耕稼失所蘇爾坦上言養兵所以衛民方今河
朔惟真定河間之衆可留扞城其餘府州皆當散屯于
外以為民防俟稼穡畢功然後移于屯守之地是為長
策從之加遥授同知東平府事權元帥右監軍行元帥

府事與參知政事李革守平陽興定二年十月蘇爾坦
上奏太原已破行及平陽河東郡縣皆不守大抵屯兵
少援兵不至故耳行省兵不滿六千平陽河東之根本
河南之藩籬也乞併懷孟衛州之兵以實潞州調澤州
沁水端氏高平諸兵並山為營為平陽聲援惟祈聖斷
以救倒懸之急是月壬子大元兵至平陽提控郭用戰
于城北濠垣被執不屈而死癸丑城破蘇爾坦殺贈昌
武軍節度使

富珠哩福壽為唐邑主簿大元兵攻唐邑福壽與戰死
之贈官三階賻錢五百貫

吳邦傑登州軍事判官邦傑寓居日照之村墅為大元
兵所得驅令攻城邦傑曰吾荷吾國恩詎忍攻吾君之
城與之酒食不顧乃殺之詔贈朝列大夫定海軍節度
副使

納哈塔富拉塔大名路明安入承安二年進士調大名教
授累除比陽令補尚書省令史除彰德軍節度副使以

夏去官貞祐二年調同知西安軍節度使事歷同知臨洮平涼府事河州防禦使三年夏人圍定羌富拉塔擊走之以功加遙授彰化軍節度使四年升河州為平西軍就以富拉塔為節度使上言古者一人從軍七家奉之興十萬之師不得操事者七十萬家今籍諸道民為兵者十之七八奉之者纔二三民安得不困夫兵貴精不在衆寡擇勇敢謀畧者為兵脆懦之徒使歸農畝是亦紓民之一端也又請補官贖罪以足用及請許人射

佃陝西荒田開採礦冶不報改知平涼府事入為戶部
尚書是時代宋大捷富拉塔奏宋人屢敗其氣必沮可
乘此遣人諭說以尋舊盟若宋人不從然後伐之疾讎
怒頑易以成功朝廷不能用富拉塔又言諸軍當汰去
老弱妙選精銳庶可取勝陝西弓箭手不習騎射可選
善騎者代之延安屯兵甚衆分徙萬人駐平涼關中元
帥猥多除京兆重鎮其餘皆可罷鞏縣以北黃河南岸
及金鉤橋虎牢關虢州崕嶺凡斜徑僻路俱當置兵

防守詔下尚書省樞密院議竟不施行未幾改元帥右
監軍兼昭義軍節度使行元帥府事興定二年潞州破
力戰而死贈御史大夫

鈕祜祿恩楚仕至楨州刺史被行省牒徙州人于金勝
堡已而大兵至恩楚拒戰中流矢病創臥花帽軍張提
控言兵勢不可當宜速降恩楚曰吾曹坐食官祿可忘
國家恩乎汝不聞趙坊州乎以金帛子女與敵人終亦
不免我輩但當力戰而死耳至夜張提控引數人持兵

伏以入覲恩楚使出降恩楚曰聽汝所為吾終不屈也
遂殺之執其妻子出降初潁州人遷金勝堡多不能至
軍事判官王謹收遺散之衆別屯周安堡周安堡不繕
完樓堞置戰守之具兵至謹拒戰十餘日內潰被執不
屈而死詔恩楚謹各贈官六階升職三等

時茂先日照縣沙溝酒監寓居諸城紅纓賊方郭三據
密州過其村居民相率迎之賊以元帥自稱茂先怒謂
衆曰此賊首耳何元帥之有方郭三聞而執之斷其腕

茂先大罵賊不勝忿復剔其目亂刃剖之至死罵不絕
詔贈武節將軍同知沂州防禦使事

溫特赫老爾為同知上京留守事布希萬努攻上京其
子特爾格生獲老爾脅之使招餘人不從特爾格怒亂斫而
死贈龍虎衛上將軍博索兵馬都總管以其姪默色為
後特授四官

梁持勝字經甫本名詢誼避宣宗嫌名改焉保大軍節
度使襲之子多力善射泰和六年進士復中宏詞累官

太常博士遷咸平路宣撫司經歷官興定初宣撫使布希萬努有異志欲棄咸平徙海蘭路持勝力止之萬努怒杖之八十持勝走上京告行省太平是時太平已與萬努通謀口稱持勝忠而心實不然署持勝左右司員外郎既而太平受萬努命焚毀上京宗廟執元帥承充奪其軍持勝與提控咸平治中費摩薩布萬戶韓公恕約殺太平復推承充行省事共伐萬努事泄俱被害詔贈持勝中順大夫韓州刺史薩布鎮國上將軍顯德軍

節度使公恕明威將軍信州刺史

賈邦憲霍州霍邑縣陳村人也舉進士第質直有勇畧
大元攻河東邦憲集居民為守禦計既而兵大至居民
悉降邦憲棄其家獨與子懿保於松平寨是時權知州
事劉珍在寨與之共守竟能成功珍每欲辟之邦憲輒
以衰老為辭興定四年十月兵復大至病不能避與懿
俱被執欲以為鎮西元帥且持刃脅之邦憲不屈密遣
懿歸松平遂自剄贈奉直大夫本縣令

伊喇阿里哈遼人興定間累遷霍州刺史興定四年正月移霍州治好義堡大元兵至阿里哈力戰不能敵兵敗被執誘使降阿里哈曰吾有死無貳叱使跪但向闕而立於是叢矢射殺之寶昌軍節度副使孔祖湯同時被獲既又令祖湯跪祖湯不從亦死詔贈阿里哈龍虎衛上將軍泰定軍節度使祖湯資善大夫同知平陽府事祖湯泰和三年進士

完顏魯爾錦中都路額特赫格們明安人大安中以蔭補

官選充親軍調阜平尉遷方城令改通州軍事判官以功遷本州刺史頃之元帥右都監富察齊勤執之以去未幾挈家脫歸除同知臨洮府事徙慶陽遷保大軍節度使興定五年鄜州破魯爾錦自投崖下死焉贈特進知延安府事詔陝西行省訪其子孫以聞

赫舍哩鶴壽河北西路珊沁明安人性淳質軀幹雄偉初充親軍中泰和三年武舉調褒信縣副巡檢六年宋人圍蔡州鶴壽請于防禦使與勇士五十人夜斫宋營

使諸軍譟于城上新三百餘級宋兵自相蹂踐死者千
餘人遲明宋人解圍去鶴壽追之使殿曳柴宋人顧塵
起以為大兵且至遂奔追至陳寨而還已而宋兵復據
新蔡新息褒信三縣鶴壽皆復取之得馬三百匹充行
軍萬戶從大軍出壽春敗宋人于渦口奪馬千餘匹攻
下真滁二州及盱眙軍軍還進九官遷同知息州軍州
事改萬寧宮同提舉大安三年充西南路馬軍萬戶夏
人五萬圍東勝鶴壽救之突圍入城夏兵解去遷兩階

賜銀百兩重綵十端遷尚方署令充行軍副統升充行
省左翼都統轉武衛軍都統充馬軍副提控轉鈐轄充
都城東面宣差副提控貞祐二年丁父憂起復武寧軍
節度副使破紅襖賊于蘭陵石城堦一切掠良人為生
口監察御史陳規奏乞勅有司凡鶴壽所獲俱從放免
詔徐州歸德行院拘拈放之尋遙授同知武寧軍節度
使事兼節度副使坐出獵縱火延燒官草杖一百改同
知河平軍節度使事興定元年充馬軍都提控入宋襄

陽界遙授同知武勝軍節度使事改遙授睢州刺史二
年攻棗陽三敗宋兵改遙授同知歸德府事三年奪宋
石渠寨決去棗陽濠水加宣差鄧州路軍馬從宜遙授
汝州防禦使四年宋扈太尉步騎十萬圍鄧州鶴壽分
兵拒守出府庫金帛賞士許以遷官加爵自將餘衆日
出搏戰宋兵焚營去鶴壽被創不能騎馬遣招撫副使
珠格伊埒圖追及之殺數十人奪其俘而還詔所散金
帛勿問將士優遷官爵鶴壽遷金紫光祿大夫遙授武

勝軍節度使俄丁母憂以本官起復權元帥左都監行
元帥府于鄜州興定五年閏月鄜州破鶴壽與數騎突
出城追及之鶴壽據土山力戰而死謚果勇

富察羅索東北路按春噶爾罕明安人泰和三年進士
調慶都牟平主簿尋以廉能遷中都右警巡副使補尚
書省令史知管差除貞祐初除吏部主事監察御史丁
母憂服闋充行省經歷官改京兆治中遙授定西州刺
史充元帥參議官興定二年與元帥承裔攻下西和州

博索由秦州進兵抵棧道宋人悉銳來拒羅索乘高立
幟策馬旋走揚塵為疑兵別遣精騎掩出其後宋兵大
潰乘勝遂拔興元進一階除丹州刺史再遷同知河中
府事權元帥右都監河東路安撫使復取平陽晉安優
詔褒寵進一階賜銀二百兩重幣二十端遙授孟州防
禦使權都監如故將兵救鄆州轉戰而至城破死之贈
資德大夫定國軍節度使謚襄勇勅行省求其尸以葬
鈕祜祿資祿本姓張氏咸平府人泰和伐宋從軍有功

調易縣尉遷潞縣主簿貞祐初遙授同知德州防禦事
改秦州三年遙授同知通遠軍節度使事定元年改西
寧州刺史賜今姓久之遙授同知臨洮府事兼定西州
刺史從元帥右都監完顏阿林破宋兵于梢子嶺三年
攻破武休闕資祿功最詔比將士遷五官職二等外資
祿更加官職一等遙授通遠軍節度使刺史如故五年
遙授隴安軍節度使俄改金安軍詔曰陝西行省奏軍
官闕員鄉久在行陣御下有法舊隸士卒多在京兆今

正防秋關河要衝悉心備禦將兵救鄜州閏十二月鄜
州破被執不肯降遂死贈銀青榮祿大夫中京留守元
光元年言事者謂資祿褒贈尚薄詔錄其二子烈山林
泉升職一等陝西行省軍中用之

趙益太原人讀書肄業大元兵入境益鳩合土豪保聚
山隘屢戰有功晉陽公郭文振署為壽陽令駐兵榆次
重原寨遂率衆收復太原夜登其城斬馘甚衆所獲馬
仗不可計獲老幼二萬餘口以出升太原治中復擢同

知府事兼招撫使元光元年八月大元兵大至攻城益急知不可支迺自焚其府庫殺妻子沉其符印于井遂自殺宣宗聞之嘉歎贈銀青榮祿大夫河東北路宣撫使仍諭有司求其子孫錄用

侯小叔河東縣人為河津水手貞祐初籍充鎮威軍以勞補官元光元年遷河中府判官權河東南路安撫副使小叔盡護農民入城以家財賞戰士河中圍解遷治中安撫如故樞密院奏小叔才能可用權位輕不足以

威衆乞假符節十二月詔權元帥左都監便宜從事提
控吳德說小叔出降叱出斬之表兄張先從容言大兵
勢重可出降以保妻子小叔怒謂先曰我舟人子致身
至此何謂出降縛先於柱而殺之飯僧祭葬以盡戚黨
之禮頃之樞密院遣都監顏琳與小叔議兵事小叔出
城與顏林會石天應乘之取河中府作浮橋通陝西小
叔駐樂李山寨衆兵畢會夜半坎城以登焚樓櫓火照
城中天應大驚不知所為盡棄輜重牌印馬牛雜畜死

于雙市門小叔燒絕浮橋撫定其衆還昭毅大將軍遇
授益州防禦使同知府事監軍安撫如故二年正月大
元十萬騎圍河中總帥額爾克遣提控孫昌率兵五千
樞密副使完顏薩布遣李仁智率兵三千俱救河中小
叔期以夜中鳴鉦內外相應及期小叔出兵戰昌仁智
不敢動小叔斂衆入城圍益急衆議出保山寨小叔曰
去何之密遣經歷官張思祖潰圍出奔告于汴京明日
城破小叔死不得其尸總帥額爾克以河中府推官籍阿

爾威代小叔權右都監樞密院奏小叔功卓異或疑尚在
遽令阿爾威代之絕歸向之路至是小叔已亡四十餘日
中條諸寨無所統領乃詔阿爾威權領宣宗思小叔功下
詔褒贈切責額爾克不救河中之罪

王佐字輔之霍州農家子豁畧不事產業輕財好施善
騎射興定中聚兵數千人權領霍州事平陽胡天作承
制加忠勇校尉趙城丞遷霍邑令同知蒲州軍事權招
撫副使蒲州經畧使詔遷宣武將軍遙授寶昌軍節度

副使大元兵取青龍堡佐被獲署霍州守將隸元帥崔
環質其妻子招撫使成天祐與環有隙佐與天祐謀殺
環天祐曰君妻子為質奈何佐曰佐豈顧家者邪元光
二年七月因環出獵殺之率軍民數萬請命加龍虎衛
上將軍元帥石監軍兼知平陽府事佐與平陽公史詠
素不協請徙泌川王女寨詔從之仍令聽上黨公完顏
開節制是歲七月救襄垣中流矢卒贈金吾衛上將軍
以其子為符寶典書

洪果玖珠臨潢人大定間以廕補部令史轉樞密院令
史調安肅州軍事判官明昌四年為大理執法同知薊
州軍事再遷潞王府司馬累官河東北路按察使轉運
使改知彰德府事戰歿贈榮祿大夫南京留守仍錄用
其子孫

烏凌阿奇珠大名路明安人大定二十八年進士累官
補尚書省令史除山東提刑判官英王府司馬御史臺
舉前在山東稱職改太原府治中簽陝西按察司事歷

汝州沁州刺史北京臨潢按察副使遷扶餘路節度使
未幾以罪奪三官解職降德昌軍節度副使崇慶初戌
邊有功遷一官賞銀百兩重獎十端轉利州刺史貞祐
初改同知咸平府事遷歸德軍節度使改興平軍就充
東面經畧使尋罷經畧司改元帥右都監赴援中都戰
歿贈榮祿大夫參知政事以參政半俸給其家

圖們色埒默咸平路明安人襲父明安明昌中統所部
充押軍萬戶戌邊承安中討契丹有功除陳州防禦使

遷知平涼府事改保大軍節度使徙知彰德府事貞祐四年大元兵復取彰德色埒默死焉

尼瑪哈富勒呼中都路明安人明昌五年進士累官補尚書省令史從平章政事布薩揆伐宋兵罷除同知崇義軍節度使事察廉改東平府治中歷環州裕州刺史翰林待制開封府治中大理卿尋擢知河南府事兼河南路副統軍貞祐四年急備京西為陝州宣撫副使兼西安軍節度使是歲大元兵取潼關戍卒皆潰富勒呼

御戰兵敗死焉

烏雅威赫隆安路明安人補親軍充護衛除益都總管
府判官中都兵馬副都指揮使累官會州刺史貞祐初
為左衛將軍拱衛直都指揮使山東副統軍安化軍節
度使土賊據九仙山為巢穴威赫擁衆不擊賊愈熾東
平行省蒙古綱劾奏威赫不任將帥朝廷不問改鎮西
軍權經畧副使歷全安武勝軍興安四年改泰定軍是
歲五月兗州破死焉

烏雅恩徹亨隆安府明安人大定二十八年進士累官
補尚書省令史除順天軍節度使使召為治書侍御史
刑部員外郎單州刺史戶部郎中河東北路按察副使
同知大興府事秦州防禦使丁母憂起復泗州防禦使
遷武寧軍節度使徙河平軍兼都水監坐前在武寧奏
軍功不實降沂州防禦使遷汾陽軍節度使兼經畧使
興定二年九月城破死焉

鈕祜祿貞本名綽哈西南路招討司人大定二十八年進

士歷教授主簿用薦舉除河北大名提刑知事察廉遷
都轉運戶籍判官累官泰定軍節度副使丁父憂服闋
除德興治中宣德州刺史攝武衛軍副都指揮以禮部
郎中攝國子祭酒與恩州刺史攝武衛軍副都指揮使
鈕祜祿哈達河間府判官攝同知順天軍節度使瑪察克
齊納爾保州錄事攝永定節度副使伯特章努出議和事
二年和議成賞銀二百兩重弊十端玉吐鶻改戶部侍
郎歷沁南河平鎮南集慶汾陽軍節度使貞祐四年改

昭義軍充潞州經畧使興定二年入為工部尚書由壽州伐宋攻正陽有功權元帥左都監守晉安府興定三年十一月城破貞與府官十餘人皆死之

金史卷一百二十二